

Antar-Suraj

Aparajita (Shruti Nada Poddar)– February 2013

Wah Raushan Hai, Nij ka Pyara
Jagat mein sab se hai nyara
Tan man Vishaal, wah hai Misaal
Jo door kare nit andhiyara

Jis Rooh ki rahti hai agan
Anginat sulagte taron me
Wahi to hai, Tapta hai jo
Khudi nis din angaaron mein

Jiske Mastishk me palte hain
Vichaar anant, Aakaar anant
Jiske karmon se phalte hain
Jeevan me jan uddhaar anant

Jab tak hain jaan, woh hai jawaan
Uski Leela me ramte hain
Watan aur seema se pare
Ham usko chaha karte hain

Har pal pal mein wah chitrakaar
Racha kar chand lakeeron mein
Apne man ke anant swaroop
Wah bharta hain taqdeeron mein

Hai Umra ki seema ke pare
Nirantar hai uski maya
Jeevan ka Karigar hai wah
Raushan karta hai har kaya

Hai woh anant, hai woh achal
Par fir bhi chalta hai pal pal
Na jane kis kinaare ko
Hai dhoondh raha wah man chanchal

Kitna paya, kitna khoya
Na jaane kya hai khoj kahan
Shayad kucch soona hai ab bhi
Jab ke paya saara jahan

Vish peekar muskurata hai
Kahta – sab kuchh to hai accha
Jaane na koi, uske dil me
Kya hai sahmi uski iccha

Pita, Saathi aur baccha hai
Wah dil ka bahut hi achcha hai
Saagar hai pyaar ka wah saathi
Natkhat hai wah par saccha hai

Jaane anjaane mein wah ab
Is jeevan me jab milta hain
Kirnon ke dhage se shayad
Ik dor atoot ko bunta hain

Wah brahm bhi hai, agyaani bhi
Rang jaata hai wah sab ke rang
Sukh deta hai, dukh harta hai
Hai divya paheli uska sang